

Buna sira, buna sira me cari siuri!! E ben, c'me c'la va? Dop 65 ani a suma ancora chi per rapresentè sta Divota Cumedìa con tut la passion e u sentiment che noi as sentuma an l'el cor.

Us capis che an 65 ani ad robi u n'ajè cambià ant'el mond, an Italia e chi ant'la nostra sità. Tonti i son cambiaj an mej, cuccējna magari en pes.

E noi? Noi ajuma dacc el combi a cui ch'ij son pü, ma u spirit a l'è semper cul perchè auvruma teni viva l'ünica tradision du dialèt lisandren cu j'è an sità. E a suma cuntent che sta tradision la seja ligaja con na tradision pü vegia e pü ampurtonta, c'l'è cula du Nadal e del Presepio che, uarda te che cumbinasion, u l'a anventaja propi Son Fronsesc e donca l'è propi na tradision di Frà. Eh, uj n'è pasà di fanciot chi ant'la curt di Frà. Anche l'Avucat Moraschi l'è stacc jën di sti fanciòt, jën ad cui an gomba ch'javu fundà l'Asuciasion 70 ani fa. L'ha travajà tont e u scriviva ben; l'ha lasà anche diversi libi chi parlu ad Gilindu e d' l'Asuciasion. Cuc meis fa u Signur u l'ha ciamà e noi chi al ricurduma e a suma sicür che ades l'è là ch'el prega per noi.

A diva di cambiament: an America ist'ani j'on cambià el President; an Rüssia no perchè là l'è an po' divers; ma l'è cambià lü e tont an Rüssia c'mè an Cina, Polonia e ant'jater Pais du "socialismo reale" u j'è sciupà el bugnòn. Osà, perchè sa gent lé j'eru c'mè na pügnata an d'o cui bujiva i cisi e i fasò: i burbutavu e po', quondi cu j'è stacc an po' ad "perestrojka" j'on facc soutè ant l'aria el querc. E dato che adess u j'è la "glasnost" a puduma vighi anche noi se cuj sucied da là. L'è nent che "perestrojka" el voja di bicarbonato e che "glasnost" u seia in prodotto da fè pulid i veder, no, ma... l'è quasi medesim! Umsogna che cula gent là i stagu atent e ch'jabiu an po' ad pasiensa per fè el robi ben faci.

Anche a Berlino finalment j'on tracc sü la muraja! Anveci chi da noi i noster amministratur, chi von semper contra curent, j'auvrivu tirè sü in murajët an piasëta d'la Lega!!!

Comunque, u smeja ca seju an s'la stra bouna per la pas e la libertà: Gorbaciov l'è fiina andacc dal Papa e po' u s'è ancuntrà col President d'l'America. Speruma ben!

Anche chi an Italia u j'è stacc del nuvità, sè, a Lui j'on turna facc in Guvern bele nov e dato chi stontavu a butes d'acordi, j'on pensà ben ad numinè President in giuvnot c'us ciamà Andreotti!!

Ista sè c'l'è na nuvità! Is'ater lé a l'è c'mè la Torre di Pisa: la pend semper pù tont, i voru sarela sü ma l'è semper là, la casca mai!!!...
Ades am vis pù sa parlava d'la Tur ad Pisa o d'Andreotti! Mah! A ven vegg anche me e cuche vota a fas an po' ad cünfusión.

Ah, per sulè, ad cünfusión i na fon tonta anche i comunista, neh! Ades at sai pù c'me ciamei. I voru cambiè nom: me a crèd cu seja mei cambiè gl'idei, cambiè la testa e po', se mai, us po' cambiè anche u nom. I sicialista anveci no. Lur i son semper secur, i cambeju mai: basta esi lè an cuc post and'o cus c'monda e po' i son a post!

Sta prüma, av visev? J'on ubligà j'automobilista a bütes el bardeli ad sicürèsa; sè, me aj ciam bardeli perchè i pasu anche chi a travers u stomi e el doni j'on avì cuche probleme. Dato che el mülti i son salaji, nent per la sicürèsa, no! tucc i son dacc da fè: chi c'l'ha bütà in cartel an s'el vulont d'la machina, chi c'l'ha na sunereja c'la smeja na sveglia ca la pionta pù lè fün tont che ta t'ei nent ligà el bardeli. I napuliton anveci j'on facc pù prèstü: j'on anventà el majèti e el camisi con la bardela bele pitüraja e c'sè el guardji da lunton is n'antajavu nenta!

Anche la manera ad vivi l'è cambiaja: na vota el doni i purtavu i cavì long e j'omi i cavì cört; ades l'è facil che t'vighi del doni begli e ravaji e d'j'omi cou ciuciu e j'urcen. Cul c'um fà sciupà dau reji i son cui omi beje platà dad' non ch'is fon crèsi i cavì d'adrera per pudeisi fè u ciuciu!

Na vota u gelato il mangiavu an mache d'istà, ades il mongiu anche d'invern. Magari is bütu el paltò e i plison, però u gelato il mongiu l'istès perchè ca l'è ad moda, c'me c'l'è ad moda ades andè an gir an s'i "fuori strada"! Dato che ad machini u na j'è semper pù tonti e el strà i son semper culi, andò c'anduma a pasè noi ades? An si cup?

Po', cert voti, quondi che t'ei an gir, 't senti di discurs c'umbsogna che t'ai pensi an po' ansüma per savej ad se chi parlu. El capita dau tabachen, au supermercato, dal farmacista. "E ben, c'me cu stà?" "A j'o dacc cul guti cu m'ava scrice u dutur e ades la va mei. Sè, a l'è ancora an po' gialda e mola ma u smeja cu s'arpeja". "Oh! el me, s'la seisa, el fa anmache di marlen e po' an cà l'è in disaster! Ma saj büt nent el palturen el vo' nent sorti". - "A la meja a j'ho bütà na gasa an testa, la smeja in amur!". Se ch'iv scrèdi chi parlu? Ad masnà? No!... I parlu ad con e gat, ades che ad masnà u na j'è pochi. E u j'è i libi e el rivisti specialisai chi scrivu füna l'oroscopo! El gatto Ariete a l'è estroverso, cul d'la Bilancia anveci a l'è depresso.

Noi an campagna quondi che el con el fà la guardia al bëci e al gat u ciapa i rat a suma beje che sudisfacc. At che oroscopo!!

An sità anveci el robi i son tuti pü cumplicaj. E a cumplichè el robi ij pensu anche cui del Cumën, neh!

J'on c'mensà i travai an Piasa S. Stevu e an Piasa Ratas, j'on bütà del ciuendi pitürai e culurail ma la gru an s'el canton d'la piasa a l'è semper lè e u smeja che i travaj i vagu nent anon. I voru rangiè el strà e la stasion e i tron ant'l'aria dapertutt. I c'mensu, po' i piontu le, po' i tacu turna. Uardè an Via Cavour: j'on c'mensà a febrar e j'on finì per el Feragust; an Piasèta d'la Lega, a parte la question del murajèt, j'on c'mensà e piontà lè quaranta voti e la gent i duvivu fè la gimcana e u slalom an mes ai palèt per pudei pasè.

Ades, forse, j'on finì la pavimentasion e, per furtëina l'obelisco a l'è semper lè an mes. Certo che per fè pü spasi i l'on studiaja bela, neh! J'on piasà l'edicula an mes el Curs Ruma!! A son curius ad vighi che fen ch'ij faron fè!

St'istà po' ant'la curt del Municipio u j'è stacc an po' ad... confüision con la question d'l'inceneritur, d'la piattaforma chi voru fè le a San Miché, e u j'è vulà anche del boti. Me a digh c'l'è nent acsè ch'is rongiu el question ampurtonti c'me isti. Umsogna stè a senti la gent ch'is n'an-tendu ma anche stè a senti la gent del pais pruma ad piè del decision!

Dato che ad cünfusión u n'a j'è tonta e ad sold u n'a j'è semper pochi, anlura j'on pensà ben ad spendi in mügg ad sold per fè la pruvucasion ad Piasa Ratas. Pruma j'auvriu fè el parcheggio sotterraneo ma ades u Sendic l'ha ritirà la delibera e l'ha facc stüdiè, mah! del Testi asuciaj, perchè na testa sula l'era nent a basta, la sistemasion d'la piasa. Certo che sti architetti i na fon di sold! Pruget toncc ma realisasion pochi. Is pruget ch'j'on facc vighi suta in tendon an Piasa Ratas u smiava na turta!!!

S'jandavu da Pittatore i na piavu jëina pü bouna e i spendivu pü poc.

Umsogna stè atent a spendi i sold püblic, cui ca paguma noi con el tasi, senza esi però starcè c'mè cui trei fradé che quondi cu j'è mort so pari i discütivu per fej el füneral. El prüm c'l'era pü generus, el fà: "fumji in füneral ad prüma classe"; u sgond el fà: "ma no, fumijla ad sgonda c'l'è listëss" - u ters u taca: "ma... forse... l'è mej...". An certo punto el mort u souta sü e el fà: "sa, dem el braji c'a vag da bele sul au simite-ri!!".

In gron aveniment per tucc i Cristion ad Lisondria ist'ani l'è stacc l'ariv del Vescuv növ; ah! l'è jën digurdì, neh!, jën ch'el parla ciar e cu sa se ch'el vo'. Per Son Baudulen u j'à ciamà tucc e l'a dicc c'umsogna fes vighi e fes senti per fè capì a la gent che aj süma e a travajuma anche noi

per el ben d'la gent e d'la sità. E noi con Lu, ant'ist Festi ad Nadal, a preguma el Bamben perchè cum monda tucc el benedision c'ajuma dambsogn.

Adess l'è mej ca la pionta lè perchè se no la sunada la ven trop longa e anlura tacuma con sta divota cumedia.

Adess av present la me famija...

